

5. september 2025

UKA 2025/66

Inatsisartut suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Apeqquteqaat aallaavigalugu oqallinnissamik siunnersuut, qanoq ililluta qulakkeersinnaaneripput, maani nunami takornariat amerligaluttuinnarnerisa nalingata siuariartornermik suliffissanillu amerlanerusunik pilersitsinermik innuttaasunut iluaqutaasinnaasumik
(Inatsisartunut ilaasortaq Jørgen Rosbach, Demokraatit)

Maani nunatsinni maannakkorpiaq periarfissarujussuup qeqqaniippugut. Mittarfissuaq nutaaq Nuummi, aammalu Ilulissani Qaqortumilu atulersussat, taamaasilluta matu avammut silarsuarmut ammassavarput, takunikuunngisaannakkatsinnut. Inissisimaffik, atorluarniagassarput silarsuarmi pitsaanerpaat ilaattut takornariatitsinermik pilersitsinermut. Eqqarsarluartariaqarpugulli.

Qaquguluunniit takornarissat amerlassusaat, iluatsitsinermut allaaviunngisaannarlik. Akerlianilli iluatsitsinermut aallaaviussaaq, takornarianit ataasiakkaanit qanoq annertutigisumik isertitsisinnaanersugut. Taamaattumik misigittaatumik takornariaqarnermi aningaasaqarnermut pullaveqassaagut: Akiliisinnaasunik takornariaqassaagut, immikkuullarissunik, piffinni pitsassuarnik misigisassanik pisiniarlutik tikittunik.

Tassunga atatillugu erseqqissassavara Demokraatinut suna pingaarnersaanersoq; aningaasat nunatsinniiginnassapput!

Aningaasat nunaqavissunut suliffeqarfiutilinnut sullissisunullu, suliffissanik pilersitsisunut, ineriartortitsisunut namminnerlu illoqarfigisaminni nunaqarfigisaminnilu siunissarissaarnissamik sullissisunut tutsineqassapput. Qulakkiissavarput, nunanit allaneersut sullissisut, iluanaarutiniq aallarussinnginnissaat, uagut nunaqavissut tikkuinnartilluta pinngortitaq seqummakoq iluanaaruteqanngitsoornermillu kinguneqartitsisumik. Takornariaqarneq suliffiussaaq, piginnittuuneq, isertitat isummernerillu uagutsinniillutik kalaallini. Taamaappoq aamma ukiup ilaannaani suliaartortorpassuarnit, takornariat nalaani avataaniit suliaartortitanut akileraarutitigut isertitanut tunngatillugu. Uani pingaartuuvoq, tappiffigilluinnarnissaat, akileraarutitigut isertitassat, pissatta pinissaat.

Tassunga atatillugu pingaartorujussuuvoq, suliffiit amerlanerpaat nunaqavissunik inuttalersinnaanerit. Taamaattumik Demokraatinit suliaqarpugut aamma politikikkut maani nunatsinni suliffissaqartitsinerup nukittorsarnissaanik, kikkut tamarmik sulisinnaasut, sulilersinnerisigut. Kikkut tamaasa tapertaasinnaasut, pisariaqartippagut.

Tassungalu ilutigalugu eqqaamassavarput, takornariaqarnerup qaffannera suliffeqarfinnik isertitanillu peqquteqaannanngitsoq. Ineriartorneq ima ingerlassaaq, takornariatitsinermut tunngaviulluinnartup



paarilluarneratigut; tassalu avatangiisitta pinnersorsuup, eriagisassatulliaammalu kulturitta immikkuullarissup. Avatangiiserput kulturerpullu misigisassanut neqeroorutigisinnaasatsinnut, toqqammaviulluinnarput. Taamaattumik takornariartitsineq eqqarsarluarluta ineriartortissavarput, kingulissatta inuussutissarsiutigisinnaassaattut, qulakkeerinnittumik.

Eqqortumik ingerlakkutsigu, takornariaqarneq isertitsivissatta tulliatut annertuutut inississinnaavoq. Inuussutissarsiutinngorsinnaavoq, aningaasaqarnermik annertusaasoq, piffimmi ineriartortitsisoq aammalu avatangiisitsinnik kulturitsinnillu paarsilluartoq. Piumasaqarnissamulli sapiissuseqartariaqarpugut, tassanngaannaq inerniligassanut naaggaarnissatsinnut sapiissuseqartariaqarpugut, piumasaqarsinnaallutalu, takornariaqarnerup nalingata maani nunatsinniiginnarnissaanik.

Tamanna tunngavigalugu soqutiginantippara isummersorfigitissallugit apeqquteqaatit ataaniittut Naalakkersuisunut aammalu partiinut maani Inatsisartuni:

- Qanoq ililluta qulakkeersinnaavarput, takornariartitsinermit isertitat annertunerusumik nunaqavissut suliffeqarfiutaannut sullissisunullu tuttarnissaat nunanit allaneersunut sullissisunut tunnatik?
- Qanoq ililluta takonarissamut ataatsimut isertitaq ersarilluinnartumik qaffassinnaavarput, tikeraat ikinnerusut aningaasatigut iluanaarutiginnissaat anguniarlugu?
- Suliniutit suut qulakkeersinnaavaat, nunanit allaniit ukiup ilaannaa suliaartortartut takornarialerisut akileraarutitigut isertitaasa annertunerusumik nunatsinniitiinnarnissaat?
- Qanoq ililluta takornariaqarnerup annertusarnera oqimaaqatigiisissinnaavarput avatangiisitta eriagisassap mianerinissanut, kulturitta aammalu piffinni innuttaasut inuunerissaarnissaannut?
- Qanoq ililluta ilinniartitaaneq piginnaasatigullu qaffassaaneq nukittorsarsinnaavarput, kalaallit amerlanerit takornariaqarnermi sulinissamut periarfissaqalersillugit?

Qilanaaraara tusassallugu partiit allat Naalakkersuisullu pineqartunut qanoq isummersornersut. Takornariaqarneq periarfissaavoq assissaqanngitsoq, aammali periarfissaq akisussaaffimmik malitseqartussaq. Qulakkiissavarput, takornariaqarnerup uagut piumasatsitut ineriartornissaa aammalu tamatsinnut tamattalu siunissatsinnut iluaqutaasumik ingerlanneqarnissaa.